



Demo e o seu mundo

CATEGORÍAS RELACIONADAS

Orixé do cruceiro de Entrecastrelos

Localización: En fronte da casa de Fariña. Foi trasladado uns metros, por mor da construción dunha presa para a auga.

Lugar: Entrecastrelos

Parroquia: Ribela

Concello: A Estrada (Pontevedra)

Un home da casa de Fariña foi á noitiña ao muíño de Lourenzo no río Umia. Cando regresou xa se fixera de noite, e ademais pechara de néboa e non era quen de ver camiño nin carreiro.

De repente, sentiu un ruído forte, como de trono, e viu, entre a néboa, unha nube loira. Non sabía que facer nin que decir; ata que, falando para si, dixo:

-E, que fago?

-Métete aquí - escoitou que lle dicían, mentres vía como se abría na nube un oco grande e negro que o convidaba a entrar.

A nube, decatouse o home de contado, era un disfraz máis dos moitos que adoita o Demo, e o burato negro que lle ofrecía non era outra cousa que o mesmísimo cu do Demo.

E xa case obedecía, e xa se disponía a entrar naquela caverna escura cando, probablemente de xeito involuntario, se lle ocorreu fazer o sinal da cruz.

De inmediato a nube (Demo) estoupou. O home correu camiño arriba canto puido ata chegar a carón da súa casa onde sentou sen alento. Mais, lembrándose da sorte que tivera, prometeulle a Deus facer un cruceiro naquel mesmo lugar en sinal de agradecemento.

Mágoa non sabemos exactamente onde se erixiu o cruceiro de Entrecastrelos orixinalmente, pois ese era o lugar exacto onde aquel home da casa de Fariña decidira perpetuar para a memoria dos veciños o enorme medo, o pavor, que pode causar o Demo.

BIBLIOGRAFÍA

REIMÓNDEZ PORTELA, Manuel, *A Estrada rural*, Excma. Deputación Provincial de Pontevedra 1990.